

# HOMERO EUSKALDUNA.



## IPARRAGIRRE-RI KANTA.<sup>1</sup>

(ENE ADISKIDE ON FEDERIKO BARAIBAR-KOARI).

Jaso nai nuke kantatzalle bat,  
Mendiok baño gorago,  
Jaso nai nuke albanezake  
Odeyez ere arago,  
Illargitikan Eguzkiraño  
Andik izarretaraño,  
Izarretara jaso dezadan  
Almena baña ¿non dago,  
Egorik gabe nere buru au  
Jaso ezinda banago?

Izarretara jaso dezadan  
Betor andikan almena,  
Goragotikan grazia, etorki  
Eta doairik onena;  
Betor zerutik mingañ eztitsu,  
Leun bat aingeruena,  
Arek gaur artu dezan gloria  
Irabazita duena,  
Dalako bera euskaldunetan  
Neretzat euskaldunena.

Euskaldunetan euskaldunena  
Kantatutzeko lur oni,  
Mundu bietan euskaldunena  
Kantatzen Euskera Amari,  
Orregatikan zorretan gaude  
Euskaldun danok berari,  
Koroi eder bat antolatzeko  
Euskaldun umant zanari,  
Urez anditik, zeñda emendik  
Ain ospatsua danari.

Guri konsejo onak ematen  
Bera zan euskaldunena,  
Ark esan zuen batzar danetan  
Eiteko gure izkera;  
Eta biziko gerala emen  
Pakez, garbiro onela,  
Ots egiñikan lotsagaberik  
Bizi dedilla Euskera,  
Nork uste zuen au dala Jaunak  
Zerutik jechi duena.

(1) Composicion premiada con *accesit* en el certamen literario celebrado por el Ateneo científico y literario de Vitoria.

Nola berari onrau zor zayon  
 Abiatzen naiz onratzen,  
 Zeren gitarra zarcho batekin  
 Zuen poztu, naiz tristetzen,  
 Zeren estutu, zeren lasaitu,  
 Arek zekien egiten,  
 Ichasoko urak diran erara  
 Apaldu zeñ da jaikitzen,  
 Modu berean gure biotzak  
 Zituela ill ta piztutzen.

Argatik Jaunak zabaldu zion  
 Laster izena Frantzian,  
 Ingelaterran, Alemanian,  
 Orobat ere Italian,  
 Beldurra nola ipiñi zuen  
 Emenche gure Españian,  
 Erbestetu zan eragotzita  
 Bizitzen Euskal-errian,  
 Gero ogei bat urte egin zuen  
 Lurraren beste alderdian.

Ara baño len utsi zizkigun  
 Jarrita kantzak ugari,  
 Beren artean samurrena bat  
 Adio Euskal-erriari,  
 Beste kanta bat eder ederra  
 Aizkibel jakintsuari,  
 Oraindik berriz ederrago bat  
 Jarria Aritz zarrari,  
 Zeñek ematen dion gloria  
 Andi bat Euskal-lurrari.

Au da kanta bat, mundu guztian  
 Zabaldutana nora,  
 Kanta aiñ bikaiñ, aiñ ospatsu au,  
 Etzaigu illko iñola,  
 Zeruko argiz Joñe-Mari-ri

Uste det jechi zayola,  
 Homerok ere etzuelako  
 Jasoko obeki arbola,  
 Apolok ere beste kanturik  
 Noiz alchatu du aiñ gora?

Kanta dezagun batzar danetan  
 Kanta aiñ paregabea,  
 Kanta dezagun adoratuaz  
 Arbola santu gurea,  
 Kanta dezagun bera degula  
 Manchik gabeko lorea,  
 Gogoraturik itz orietan  
 Iparragirre trebea,  
 Zergatik berak kanta zituen  
 Biztzeke gure fedea.

¡O! zeñ ederki biltzen gaituan  
 Aritz zarraren oñean;  
 Lau probintziok anayaturik  
 Batzen an erramapean,  
 Irme ta sendo alkaturikan  
 Laurok korapill batean,  
 Laurokin lazo bat egiñikan  
 Fuerodun izan gaitean,  
 Goza ditzagun zorion danak  
 Guraso zarren legean.

¡O! zenbat bider Madrillen ber-  
 Entzunizan zan kant ori, [tan  
 Euskal uriak adi zioten  
 Asmatzalle ez illkorrari,  
 Errietako konsejuetan  
 Askok ikasi berari,  
 Duda gaberik euskaldunetan  
 Kanturik onen dirudi,  
 Joseri baño nik enioke  
 Deituko errege iñori.

Orregatikan eo dezagun  
 Koroi bat artearekin,  
 Lau probintziok gaur dizayogun  
 Jantzi burua berakin,  
 Molda dezagun, molda bertatik,  
 Molda alegin danakin,  
 Ez urre, ez perlaz, ez diamantez,  
 Ezpada obearekin,  
 Diña dalako, iñor bada diñ  
 Jazteko ostoarekin.

Aritz ostoz bai, jantzi dezagun  
 Euskaldun orren argia,  
 Arbola ostoz ornitu ari  
 Kopeta zabal garbia;  
 Utsik Arbola ostoz apaindu  
 Iparragirre andia,  
 Arbolarekin betiro bizi  
 Dakigun Jose Maria,  
 Arturikan gaur anayok gandik  
 Illko etzayon saria.

Bizi zaitea Iparragirre,  
 Orche Parnaso mendian,  
 Zergatik musen maitetzallea  
 Ziñan bizitzan zu beian,  
 Apolok zauzka euskal kantari

Danen guztien erdian,  
 Deitu dakizun zuri Homero  
 Zerorren jayoterrian,  
 Naikunde ori erabilli det  
 Iya aspaldi guztian.

Deitu bekizu, deitu euskaldun  
 Bertsolarien izarra,  
 Deitu bekizu ajola gabe  
 Maisua jotzen gitarra,  
 Zortziko soñu onak asmatzen  
 Zera danoen azkarra,  
 Kantatutzeko eztarritikan  
 Geyen daukazu indarra,  
 Gañera zera eztitasunez  
 Errechinola bakarra.

Beste Joserik ez dakust ez nik  
 Nere gidari zu zera,  
 Jaurtigi-dazu zure chinpart bat,  
 Jargoi ortatik lurrera,  
 Lagun zadazu Parnasotikan  
 Izaten zure antzera,  
 Jaso dezadan izkuntza zar au  
 Izkuntz berrien gañera,  
 Berau dalako geienen ama  
 Nere lastan dan Euskera.